

A Sacîl, la Fieste de Patrie dal Friûl edizion 2025

Une citât che e je un simbul: li al è stât promulgât l'antîc "codiç" dal dirit furlan volût dal patriarcje Marquart

Al è stât Sacîl a dâ acet a lis celebracions de edizion 48 de Fieste de Patrie dal Friûl pai 948 agns de costituzion dal Stât patriarcjâl furlan, fondât ai 3 di Avrîl dal 1077. Une siele pardabon simboliche par vie che propit a Sacîl, tal 1366, il patriarcje Marquart di Randeck al à volût promulgâ lis *Constitutiones Patriae Fori Iulii*, ven a stâi il codiç dal dirit furlan, restât in vore fin al 1797. L'event, celebrât domenie ai 6 di Avrîl, al è stât inmaneât dal Comun di Sacîl, de Region Autonome Friûl-Vignesie Julie e de Agenzie regionâl pe lenghe furlane - ARLeF, in colaborazion cul Istitut Ladin Furlan "Pre Checo Placerean". A jerin presintis, come simpri, tantis autoritâts, adun cui sindics e i rapresentants dai comuns dal Friûl. «La Fieste de Patrie dal Friûl - al à ricuadât **Massimiliano Fedriga, president de Region Autonome Friûl-Vignesie Julie**, intervignût cuntun messaç video -, *vuê e rinove il sens di apartignince che nus ten dongje. Nus ricuarde che o sin i custodis di une ereditât preziose, fate di istituzions solidis, di pluralism culturâl e di coesion sociâl e che si à di tignî di cont, difindi e trasmeti.*

Ancje **Mario Anzil, vicepresidente**



Lis autoritâts presintis ae Fieste de Patrie dal Friûl 2025

dal F-VJ e assessôr ae culture, al à evidenziât la impuartance di conservâ la identitât, di ricuadâ i valôrs dai vons - un patrimoni di secui di laboriositât e di capacitât di superâ lis dificolts, ma ancje di inressi tes gnovis gjenerazions la cussience di jessi a pâr di chestis lidris par costruî un avignî salt.

La impuartance di Sacîl te storie dal Friûl e je stade rimarcade dal **president de ARLeF, Eros Cisilino**: «Cu lis celebracions de Fieste a Sacîl o vin concentrât la atenzion su di un

fat storic che nol è ancjemò avonde cognossût: lis Constitutiones Patriae Fori Iulii, une codificazion juridiche avanzade par chê epoche, come che da rest al jere il Parlament de Patrie, un dai plui antîcs in Europe».

«Sacîl al è stât e al è ancjemò une crosera - al à zontât il **sindic Carlo Spagnol** -. O sin braurôs di vê lis nestrîs lidris tal Friûl. O volin continuâ a puartâ indenant chest leam, cul jutori di duçj». La Fieste de Patrie e je tacade cul tradizional alcebandiere de Bandiere dal Friûl. Dopo de Messe, te Glesie di Sant Uldarî, e dal salût di benvignût ai ospits e ai citadins, te Loze dal Municipi, lis celebracions civils a son continuadis tal Teatri Ruffo, cu la esecuzion dal Imni dal Friûl, la leture de Bole imperiâl, il tradizional scambi de bandiere e i intervêts des tantis autoritâts presintis.

Tra i events colaterâi, la mostre di art "Stralûs. 1985-2025 Arte in Friuli / Art in Friûl", risultât impuartant de colaborazion fra la Region F-VJ, la Universitât dal Friûl, il Comun di Sacîl e la ARLeF.

Une vore siôr ancje il calendari des manifestazions promovudis di passe 100 Comuns dal teritori furlan: cirche 200, il dopli de edizion passade.

Consegnâts i prins 10 atestâts di certificazion de cognossince de lenghe furlane pal nivel B

A son stâts consegnâts i prins atestâts di certificazion de cognossince de lenghe furlane pal nivel B, "intermedi", daûr dal CCER, il quadri comun european di riferiment pe cognossince des lenghis.

I dîs candidâts che a àn passât l'esam, fat tal Novembar dal 2024, a àn frontât cuatri provis: di comprension orâl, di comprension scrite, di produzion scrite e, par finî, un colocui orâl. «La certificazion linguistiche pal nivel B, che plui di chei altris si pee cul mont dal lavôr, cu la aministrazion publiche e cu la scuele, al è un travuât impuartant, tocjât in graciis de colaborazion cul Assessorât regionâl ae Istruzion e cu la Universitât dal Friûl. I participants a àn dimostrât un grant impegn» al à marcât **Eros Cisilino, president de ARLeF**, ae cerimonie di consegne dai atestâts, te sede de Agenzie regionâl pe lenghe furlane.